

Apertura di Old Cunucu House na Palm Beach



Yiu di sra. Alice van Romondt, den presencia di Minister Booi y e tres propietarioan di Old Cunucu House, a haci acto di apertura di e restaurante tipico situa na Palm Beach.

ORANJESTAD(AAN)-Durante e apertura di Old Cunucu House na Palm Beach, e managing director Sr. Robin Case a duna un splicacion di con nan a yega ariba e idea pa bini cu un restaurante den campo.

El a bisa cu e ta contento cu nan a yega asina leu pa inaugura un restaurante unico den campo na Aruba. Tambe el a conta di e desaroyonan cu a tuma lugar.

Sr. Case a bisa cu e proyecto a cuminsa cu dos mente trahando independientemente, pero ariba e mesun idea, es decir di Frank Leães y Roy Maduro. Frank tabata tin e cas di cunucu y tabata kier a haci algo espectacular cu ne, Roy di e otro banda semper tabata desea di establece su mes den e negoshi di restaurant pa su interer den cuminda y entretenimiento.

E realisacion pa loque nan tabata tin den mente no a sosode den un instante. Tabata tin varios dificultadnan, pero ora cu e, Sr. Case finalmente a join nan, nan a bira un trio.

Cu e punto aki e proyecto a cuminsa move cu mas optimismo pa realisacion. Despues di e prome encuentro Sr. Case tabata sigur cu pronto nan lo tin nan "Old Cunucu House".


Asina, renovacionnan a cuminsa na e cas: e idea principal ta pa e cas keda manera cu e ta, manera un cas tipico. Pero no por a haci uso di e fogon, asina ta cu mester a haci cambianan pa cuminsa cu un restaurant.

A keda dicidi cu e menu lo consisti di cuminda di lama y

internacional.

Sr. Case a manda palabranan di danki nan e banconan, especialmente na Sr. Glenly,

tur persona cu tabata envolvi den e construccion, y tur cu a duna nan un consejo valioso y aporte.



Ing. Mario G. Bikker, jefe interino di aeropuerto a viaha pa Montreal, Canada pa asisti na un curso den "advanced Airport Management". E curso lo ser teni dia 10 di April pa 20 di Mei y a ser diseña pa directornan di aeropuerto internacional y ta acentua especificamente technicanan den maneho y practica den maneho. Asistencia na e curso tabata posibel door di un beca haya di e instituto di enseñansa di Canada, ariba peticion di e Ministro di Transporte y comunicacion. Na Aeropuerto Ministro Mr. A.R. Bermudez, encarga cu Transporte y comunicacion y señor M. Nicolaas, hefe di Aeropuerto, a tuma despedida di señor Ing. M.G. Bikker.



Horoscopo

ARIES

Maart 21 - April 19



Bo asintonan economico por ta delicado. No permiti di haci gastonan modera ariba cosnan sin importancia.

Number di suerte awe: 12

TAURU

April 20 - Mei 20



Sali y diverti bo mes. No keda tanto sera den cas sin sa kico ta pasando rond di bo.

Number di suerte awe: 03

GEMINI

Mei 21 - Juni 20



Un dia den cual bo actividadnan normal ta bay agradablemente. Bo parientenan ta muestra comprension.

Number di suerte awe: 45

CANCER

Juni 21 - July 22



No firma nada prome cu bo lesa e papel cu nan lo dunabo. Bay poco poco y sigur.

Number di suerte awe: 76

LEO

Juli 23 - Augustus 22



Dia favorable pa trata cu personanan aleja di e escena publico, ya cu nan conocimientonan por ta di ayudo den bo plannan.

Number di suerte awe: 34

VIRGO

Augustus 23 - September 22



Asintonan personal ta sigui existi dibo hopi precaucion. Un persona cu bo no por kere cu yudabo sali for di bo problema.

Number di suerte awe: 10

LIBRA

September 23 - October 22



Aunque bo salud por dificulta bo trabao, bo ta maneha cu mas exito e recursonan comun.

Number di suerte awe: 87

SCORPIO

October 23 - November 22



E prome oranan di dia ta favorable pa romance y personanan queri lo por ta bo ayudo.

Number di suerte awe: 90

SAGITARIUS

November 23 - December 21



Aunque cu bo ta kere cu lo e ta bo amiga, e lo defraudabo. Pa motibo di dje lo bo por hayabo den un problema serio.

Number di suerte awe: 77

CAPRICORNIO

December 21 - Januari 19



Awe lo ta un dia poco activo pabo. Pero no keda sinta pensa ariba cosnan cu a pasa. Busca algo divertido pa bo relax bo mente.

Number di suerte awe: 18

ACUARIUS

Januari 20 - Februari 18



Un problema cu bo companero lo por surgi awe, debi di bo cabezura. Trata di comprende y yega na un solucion.

Number di suerte awe: 92

PISCES

Februari 19 - Maart 20



Un bon dia pa intenta esfuerzonan conhunto cu bo companeronan. E dia lo ta mas activo na ultimo ora.

Number di suerte awe: 35